



Ballal Fuuta media feewde he Fooyre Bamtaare

Caggal jeeyngal mawngal Mijorde Fulbe Wlnndere wadannoo Fooyre Bamtaare e hitaande 2019, Fuuta Média habrii wonde kañum e hoore mum maa lulno e jaaynde men Fooyre. Eden njetta denndanngal terde Fuuta Média, gila e lulniibe haa ße lulnaaki kala. Sikke alaa, ballondiral e gollondiral hakkunde jaayde jaltooje e demngal Pulaar, gila he rajooji mum, teleoji mum, dereeji mum, laylayti mum ekn. ko huunde fotnde semmbineede. Yo Alla nawru dum yeoso.

Duttorde kaalii ... : Kuubal Batu Kubtordinngu cosngu Fedde Bamtaare Pulaar he Muritani

“ Duttorde kaalii ” ko
lobbudu hesuru he nder Fooyre
Bamtaare, do njaltinen gede booyde,
haa teenti noon gede pinal, maa gede
FBPM kewnoode ko adii hannde. He
ndee tonngoode njaltinen ko doggol
tawtoranoobe Batu Kubtordinngu
cosngu Fedde Bamtaare Pulaar he
Muritani.

Kuubal Batu Kubtordinngu cosgol Fedde Bamtaare Pulaar he Muritani.

“ Nalnde alet 7 mars 1976, waktu 21 jamma,
batu kuubtordinngu cosgol Fedde Bamtaare
Pulaar he Muritani, joodiima to galle
Sileymaani Kan, hooreejo Fedde ndee.
Tonngoode galle oo ko 751, eskaliyee 11, to
Blocs manivelles.

Ine tawtoranoo jodnde ndee :

1. Mammadu Joop	ENA	19. Muhammed el Habiib Soh	El Nasr
2. Aali Muttaar Bah	ENA	20. Yaayaah Mammadu Bah	OPT, Nktt
3. Aamadu Umar Jah	porfesoor,	21. Sileymaani Kan	Sce Traduction, Présidence
Nuwaasoot		22. Seek Kan	SNIM
4. Bookara Aamadu Bah	Lycée national	23. Idriisa Bah	Elevage
5. Njawaar Kan	Professeur,	24. Abuubakri Soh	Hopital
Nuwaasoot		25. Muusaa Kan	Nktt
6. Mansuur Caam	BIMA,	26. Aamadu Sal	ENA
Nuwaasoot		27. Abdullaay Bah	Nktt
7. Ibraahiima Bah	Duwaan,	28. Jibril Gey	ENA
Nuwaasoot		29. Aamadu Saar	Staticien
8. Mammadu Saydu Kan	Nktt	30. Mammadu Ndionngo	Lycée national
9. Abuu Mammadu Sih	Nktt	31. Haamiidu Caam	ENA
10. Mammadu (Siley) Bah	Justice	32. Mammadu Gaako	
11. Sammba (Maalum) Caam	Hôpital	33. Usmaan Mbooc	ENA
12. Mammadu Aliu Mbooc	Lycée national	34. Sammba Sih	Nktt
13. Abuubakri Jallo	District	35. Asmiyyu Sih	ENA
14. Jakariyaa Yaal	ENA	36. Hammadi Mbooc	Nktt
15. Alasan Sih	SNI	37. Aamadu Umar Ngayde	Nktt
16. Abuu Soh (Abdul Buubu)	CNSS	38. Alasan Jiggo	PTT, Nktt
17. Jibril Njaay	Nktt	39. Abdul Raasin Bah	PTT
18. Aali Caam	ENI	40. Mammadu Hammadi Kase	PTT

OFFRE AROJOU3

À partir du 12 mai 2020



VOTRE ANCIENNE CARTE SIM VAUT
BEAUCOUP D'INTERNET, ET BEAUCOUP D'APPELS

Pour plus d'informations, contactez le service clientèle au 122.



Détails de l'offre :
 • 1Go d'internet + 30 minutes de communication nationales offerts dès l'activation.
 • 1Go d'internet offert tous les vendredis et 30 minutes de communication offertes tous les lundis. Pendant 4 semaines.
 • Offre valable pour les cartes SIM non utilisées pendant un mois et plus.
 • L'offre n'inclut pas les nouveaux clients.

شقيقيل
Chinguitel
Membre du Groupe expresso

Losko ñaayngal ngalu leydi : Laawol faade polis diggi

Muhammed Abdel Ajiju (MAA) jaabaani jaabbaade naamne widtooße bee, o jaabaano hay nootaade Goomu losko suudu sardi nguu. E wiye makko, ko duum kadi heedoobe makko kolliti, ko noddube mo bee ngala hakke loskude goonoodo hooreejo leydi, ko Ñaawirde Toownde tan jogii oon hattan, hay oon ne, ko maa wona « jamfa mawka ». Gooto e heedoobe makko tuubakoobee bee, joopii ko kuulal 93 Doosde leydi paatungal e « hurum hooreydaagu ».

Kono, to oon bannge karallo sariya muritaninaajo jaabiima mo, wiyi mo wonde ngaal kuulal 93 haadaani doon tan, ine jokkii e maggall :

1. Hooreejo Leydi fawaaki golle wadi he dumunna laamii oo, so wonaa e sifaa « Jamfa mawka » (*haute trahison*).

2. Ko Suudu sardi tan waawi joo-paade mo, rewrude he woote peeñcu e dow keeweendi timmundi terde mum. E oon sahaa ko Ñaawirde Toownde ñaawata mo.

Nii woni, doosgal leydi ngal ina rokki hooreejo leydi oo hurum e mudda nde « roondii donngal ngal ». Karallo oo beydii heen wonde kuule 24, 25, e 27 haa 39, ine ndotti donngal e mbaawka Hooreejo leydi. Ko duum wadi Hooreejo leydi waawi ñaawreede ko gede jeyaade he mbaawka rokkaa kaa. Kono, so tawii ko gede de njeyaaka he kuule kaalaade dow dee, woni gede de cifaaka he donngal makko, deen gede kay, hay ñaawirde aadaraande, haa arti noon he ñaawirde duy'orde, ina tay'i hattan mum en.

E fawaade e ko benni koo, eden mbaawi wiye hooreejo leydi rokkaaka hurum kaadtudi; soowadii gede e sifaa keeriido, tawi ko gede de ngala he donngal ngal doosgal leydi tay'ani mo ngal, hurum alanaa mo doon. Kono doon do iwaani he laamu, o waawaaloskeede saka ñaaweede ; kono, ñalnde o

rootii meetelol laamu, ñaawirde kala ina waawi loskude mo e ñaawde mo.

Hol ko MAA yoobtoraa?

O yoobtoraa, fawaade e maale keewde tawtondirde, ko warhooreeji keewdi (jamirooje jaabbugol laawol, yettugol pawaari ngol rewaani laawol, porlugol jawdi ndenndaandi, burnangol hoore mum kam e wodbe, kuutoragol laamu ngam hebde nafooje, burtingol laamu, labbingol kaalisaji tunwudi, galdegol ngol rewaani laawol, mutangol walla ustangol kubbal laamu, bonnangol nafoore renndaande). Denndaangal ngol jaabbugol sariya ngol mawdo leydi oo waawi yoobtoreede, kanko e huunde e gollodiibe makko (*hooreebe hilifaabe, hilifaabe, Ardiibe*).

Jooni noon, so MAA yeftii heedoobe haa to Farayse, laamu Muritani kam ne dañii heedoobe fellitbe heftande leydi ndii kala ko wujjananoo, haa arti noon e oodo doosiye kulbiniido. Bayri MAA kañum wiyi ko « laabdo », ko neddo kaboowo he mufsiidiin en (*hujja jeyaado e hujjaaji teerjtu si o wiynoo ngaddani mo heftude laamu e juude Siidi caggal nde udditanii won e partiji luulndo : tawaasul e UFP e yero*), ine jaaki yimbe ko addani mo salaade haalde haa ko omo waala kasoo fotde yontere.

Kasoo. Haawniinde ! MAA nde boryiti laamu he juude Siidi, wiyo ino maa mah kasooji keewdi, o soka heen « mufsiidiin » en.

60 keedanoowo Muritani

Ardii heedanoobe laamu Muritani (*walla mbiyen heedanoobe Muritani tan*), ko Hooreejo fedde awokaaji (*Batonnier*) ko Me Barahium wul Ebeti. Awokaaji mawdi kadi ina njeyaa heen, ko wayi no meednoobe ardaade ndeedoo fedde, walla wodbe kadi burbe anndireede darnde mum en ko faati he

jojande aadee. Beedoo njogori huc-condirde ko e Goomu awokaaji keeda-nooji MAA, ine heen ummoriibe haa Farayse, ardube doole e ñirjooje teen-tude feewde laamu Muritani. Cenje didi dee puddiima beeynondirde he tobbe keewde, haa arti noon he « mbele MAA ine waawi ñaaweede, e hol ñaawirde jogii oon hattan » kam e « hakkeeji makko nder kasoo » ekn.

Me Gurmo Loh kam fuddiima wiye « awokaaji faraysenaabe bee ngari ko wadde tuurisma ñorijo ñaawoore ». Addunoo haala ko gooto he been sap-pinoobe kalmaade Porkireer Kuubtodindo mo Muritani to laamu Farayse, sabu mum salaade « hedaade » dum en, sibu, e wiye oon, « duum jeyaa ko « aadaa », ko « doosgal nehdi »... O jaabii be ko « be mawnikiniibe, fuuybe » sibu « ellee jippiibe he leydi, be ngala hay hakkille juuraade fedde awokaaji Muritani tawo ... hade mum en yuryude e dabbude yiye Porkireer », o wiyi be « maa on ndarto, bismilla mon he Muritani ! »

Dacce hobbe kirnda !

MAA, nde nanngaa polis ndee woytinooma « cuurel wadaa ngel (*hey Aduna !*) « ine wuli, alaa kilim, o alaa taarorde heeriinde... ». Be njaabaama wonde « ine heñoraa nde denndaangal (wona MAA tan !) wonbe he juude polis mbadetee he ngonka burka moy'ude », tee duum ko hujja mo renndo siwil fooyi dabbude, tee « goytotoodo hanned oo, oon woni mo meedaano woyeede duum he duubi sappo laamii dii fof. Persidaa Sammba Caam woni cakkidiido mo polis politik MAA dummbunoo he lewru sulyee 2019, tawi dañaani hakke jogaade awokaa, alaa ko wadanaa ko heertii nder polis, kañum e ujunnaaje ujunnaaje Muritaninaabe heddiibe, naatoobe juude polis, nanngirteebe toon he ngonka mbonka, fuddoraade

boom poliseesi gollotoodi toon dii nii ».

E wiye Gurmo Loh, « MAA wonata hannde Muritaninaajo naatdo juude Polis, gidiido jogaade hakke e awokaa gila he daawal gadanal losko fuddorgo Polis, tee duum ko hujja mo awokaaji Muritani meedaa seerde e laajaade, haa teenji he laamu MAA. » Yeru mum he se-naateer wul Gadda. Ndeke, « kisal burngal moy'ude neddo (haa teenji he laamiido) waawi wadande hoore mum, ko gaddanaade leydi mum (woni yimbe fof) nuundal kam e yellitde pinal potal hakkeeji wonande yimbe fof » !

Hakkeeji MAA kam he hakkeeji Muritaninaabe heddiibe bee fof. Kaa haala faati ko e hakke mo MAA jogii ngam sosde, walla jogaade parti mo welaa, kam e hakke mo o jogii e wadde yeewtere ekn. Doo ne kadi awokaaji dii njaab-njaabtorii doo. Woytantonoobe MAA bee njaabtaama. « Ine foti siftineede noon, ko kanko e hoore makko, waawnunoo e sifaa luulndiido laawol dabbudogol yamiroore so neddo walla fedde yidii wadde yeewtere nder hotel. Jooni kam o humptiima hanko e hoore makko, bone makko piyti mo ».

Hol to dum fayi ?

Nalnde kala limtanooobe he ciimtol Goomu Losko Suudu Sardi ine noddee to Polis kalfinaado losko bonanndeji faggudu. Sakkii noddeede toon ko keynum MAA, kam he sehil mum biyeteedo Isidbih. Ko wonaa duum ko ine tolnoo he 63 booñ banke (kontal banke) njowaama haa anndee gede joomum en do mbattinta. Nanaama ko MAA jeyi heen booñ... E oo sahaa mo njahraten, hay gooto anndaa do dum hucci e do haadoya. Ina anndaa tan ko ñaayngal jaajngal, haa leydi ndii debi laggude. Enen kam eden nduwoo yo Muritani heftu denn-daangal ko hujjananoo, haa arti e dii duubi sappo cakkidiidi, tawa so heftii, biibbe leydi ndii fof ine naftoroor dum.

Bookara Aamadu Bah

nannde owbeeleebe tolpii e kisal leydi, sabu kafirde mum en bonde e humpito ngo njogii e hare.

Ina wayi no beesaali A.A. ndeen « yidde arditaae UPR mbele ina wadta Ghaswaani beyuwal » walla kabrugol makko wonde amo hebori « yubbinde yeewtere jaaynde », dum fofko keñjre tan wonnoo, kono anniya makko yoi yaltude wuro ngoo, o heedtoya rewo Mali, nokku welmaa dagoo, kono bone so tintaama puuyii. Nanaama kadi wonde guwerneer Hodh Shargi e kalfinaado konu to oon diwaan kebii yamiroore « yo keblu kasoo Walataa ». Ngam holduum? Duum ko Alla anndi tawo, kono Joomiraado Joom baawde Oo heewaami ubbude hakke, saka pittaali leeliidi toon dii, « bardaadi amdu e fenaande ».

Eden cikki tan, ngar-mi-ngaraa hak-kunde A.A. e Ghaswaani yettiima hankati lommet, sabu mo o joodtorinoo ko « dono » makko, walla kam « hebi dawna makko », wadii mo e kasoo. Do dum waawi joofoyde kala, maa dum wonan laambe reerdube, sanndolinbe, winndannde, maa dum feertu gite aroyoobe, kam e yoga e laambe satiibe en, be ngannda wonde yaabbiude doosde leydi wiya ina habbo tan he laamu, waaraade ngaluoji besngu, waasde ted-dinde yahdiibe mum, ko do boni tan joofata.

Maamuudu haaruuna loops

Ko buri sasa yanii he woynu

E oo dumunna fof hakkillaaji njowii ko e losko ngo Goomu Losko Dipiteeji (GLD) ummanino feewde e jiilgol laamu Abdul Ajiju (A.A.), jiilgol leydi Muritani ko ina tolnoo e duubi sappo.

Fooyre Bamtaare Hooreejo caaktugol

Bookara Aamadu Bah
bokarba@gmail.com

Winndoobe :

Aamadu Malal Gey
Muhammadu Faalil Sih
Njaay Saydu Aamadu
Jibrial Muusaa Joop
Malal Sammba Gise
Gelaajo
Muttaar Bah

Njaru : 20 MRU... 500 FCFA...
\$1.50... €1

Lowre enternet : pulaar.org
limeel :
Fooyrebamtaare@gmail.com

Yahanooma haa goomu nguu noddi be fotnoo noddude teenji noon e jaagordde liggodtonooobe e A.A. e be losko ngoo burnoo tuumde, maa wonii ko liggotonooibe he laamu hee, walla teeldube lig-gantooibe koye mum en. E oon sahaa, ko A.A. gooto e hoore mum salinoo nootaade be, tee ina joodtoraa ne kay, to bannge sariya, dum waddaaki e makko, sabu wonde mo hooreejo leydi (ko Ñaawirde Toownde tan waawi noddude mo). Goomu Losko Dipiteeji (GLD) nawtii pillitol mum to nelnoobe dum bee, hono Suudu Sardiyeji Ngenndii, been ne cosii Ñaawirde Toownde (Haute Cour de Justice), nduttii njebbili haala kaa e juude sariya .

E oodoo sahaa Polis kalfinaado loskude bonanndeeji jotondirdi e faggudu yettii haala kaa inan noddha kala be GLD joofinoo e nder pillitol mum, won heen nii fuddaabe wadfeede he niiburu (yeru won liggotonooibe BCM), be kuccanno ko A.A. (hay so ina annanoo ko o kebordo salaade nootaade) kono, he nder yolnde hee ko Polis kalfinaado Kisal Dowla noddi mo, yo o ar o nootoo ardiibe dum, o salii, hawri been ndeke kubrii galle makko, poliseesi siwil en (ebe paayi ina waawi o doga o suudoyoo), ko ina wona hojom tawi

ootoji loowdi konunkoobe halfinaabe habde e ow-beeleebe njettiima galle oo, dabbiri deenoowo damal ngal nde uddita, oon holliri yamiraaka dum. Ndeke, ko konu nguu waddatta e oon koo fof, A.A. ina yewwa dum e kameraa. O faami dum fayaani do moy'yi, kanko e hoore makko o yalti, o naamnii hol ko be cokli ? Be mbiyi mo yo o ar o nootoyoo Kisal Dowla ». O naamnii mbele ebe njoobii kaayit Porkirer, be mbeedi mo binndaado he demngal Arab. Targol kaayit oo sadtiri mo nii kono o jaabi nootoyaade. Ko ndeen hankati o faami « ko buri sasa yanii e woynu » sabu nguyaaji di o tuumetenoo nii ngontanii mo nebam, sabu be o hucondiri bee ko halfinaabe kisal ngenndi. Ine wiye o tuumaa ko « fewjude dillere fitina he neder leydi hee » mbele ardiibe leydi ndii ina ngo'ee goddum ko wonaa « nguyaaji A.A. ».

E nder kabaruji ceniidi ummoriidi e jaaynde alserinaare wiyyeteende « Algérithmes » kollitii wonde AQMI (jihadist en) ko hebornooibe diftaade A.A., be njaltina dum laamorgo leydi ndii, hono Nuwaasoot, be tiindina dum rewo Mali to o tawooya musiibbe makko ow-beeleebe heewbe, to o waawi mooloyaade. Eden kumpitii noon do bo-

Binndol Pulaar : Cadeele tappirde fof ñawndaama

Yoga e cadeele binndol Pulaar he informatik ñawndaama ko booyi, haa teenji nde denndaangal maade binndirde Pulaar/Fulfulde naati he Alluwal Unicode he kitaale 2000. Wadi en wiye yoga he cadeele, ko ine heddinoo yubbo ngo Pulaar dañanaano tawo tappirde. Paamondiren : Unicode kañum ina yaha he yubbooji dii kala : Windows, Mac OS, Linux, Android, iOS, ekn. Kono ko huunde e yubbooji burdi waawde huutoreede dii tan njogananoo kuutorde newnoje binndugol (haa teenji e Tappirde), ko wayi no Windows, e Android. Yubbooji Apple (Mac Os, e iOS) njoganno ka tappirde he Pulaar. Duum wadi huutroo be ordinateeruuji biyeteedi macintosh (di yubbo Mac Os), walla telefonaaji biyeteedi iPhone (Aayfon) ine ngondunoo e cadeele, tee ceeraani e woynaade ngalaa ko binndiri Pulaar. Kabaaru beldo oo, ko yo be mbelto sibu be ndañanaama tappirde gila he darorde hitaande ngor-denee. Tappirde ndee wiyyetee ko Bindirgal. Nde tawnoo yubbo Apple ko uddiingo, wonaa neddo kala, walla karallo fofwaawi naatde he maggo haa goloo ko yidi koo. Jooni kam, Alla e Baabayel Baro (Boggeenaajo gondo hannde to Washington, Amerik) kala kuutortoodo iPhone, walla iPad dañii ko winndiri Pulaar he sifaa newiido.

Dum noon, kala jiddo aafde bindirgal (tappirde ndee) he iPhone, wamma iPad mum, ina waawi yahde dooyene, caggal dum tuugnou e ginol garowol les ngol ngam yubbinta tappirde ndee he kuutorgal mum.

Bindirgal woni TAPPIRDE Pulaar wajere taweteende he App Store, newnoore binndol Pulaar. Dumdoon noon maa newnu kuutoragol laylayti baadi no Facebook, Twitter, Viber, Messenger, iChat, e goddi keewfi do won been haaloobe Fulfulde walla Pulaar ngalaano gedal no feewi. Bindirgal Pulaar ñawndii ndeen sadeende. Binndirgal ine wadi kadi huunde he hitooji gaddanooji mo haalataano demngal ngal woontude go-wlugol Pulaar. Bindirgal kadi, ko tappirde yaawnde no feewi.

Hol no BINDIRGAL awtortee, aafreetee ?

Go'o : Yah to App Store mo Apple.

DIDI : Dobo he yuulde Njylawu.


TATI : Winndu « Bindirgal » he eefol njylawu hee, ndobo-daa he yuulde Yiylo.

NAY : Awto « Bindirgal » tawa ada dobiroo he ruulde hee he dow laañal junnitiingal ngal. Tesko : So a meedaa-no awtaade « Bindirgal », ada waawi yiye yuulde « GET » yeeso maggal.

JOY : Dobo he Uddit ngam udditde Bindirgal. Ada waawi caggal duum uddude App Store, bennaa he daawal dewngal heen ngal.

JEEGOM : Dobo he Bindirgal Pulaar ngam udditde dum.

JEEDIDI : Dumdoon ko hello jaaborgo jaabngal ngal. Ada waawi hedaahe go-wlugol huunde e kelme Pulaar. Ada



tawa kadi he ngoo hello dowirgel puddorgel golle newingel kollowel no jaabnirgal ngal aafirtee. Uddu jaabnirgal ngal so a timminii yewndaade. Bennu he daawal dewngal heen ngam fuddaade aafde Bindirgal.

JEETATI : Uddit Teelte (Paramètres) jaabnirgal ngal.

JEENAY : Dobo he Kuufal (Général).

SAPPO1 : Dobo he Tappirde (Clavier).

SAPPO e GO'O : Dobo he Tappirde (Claviers).

SAPPO e DIDI : Dobo he « Beydu tappirde hesere... »

SAPPO e TATI : Subo « Bindirgal Pulaar ».

SAPPO e NAYI : E hello rewngo heen maa a yiy « Bindirgal Pulaar Keyboard - Bindirgal Pulaar ». Duum ine hollita a aafii Tappirde ndee haa feewi. Uddu Teelte jaabnirgal ngal.

SAPPO e JOYI : Uddit jaabnirgal Ciftingol ngam hoolkisaade tappirde ndee. Ada waawi udditde jaabngal njid-daa (Word walla goddum)

SAPPO e JEEGOM : Dobo he «+» ngam softinde tappirde ndee. Dobo caggal duum he faandu hee ngam subaade tappirde wodnde.

SAPPO e JEEDIDI : Subo « Bindirgal Pulaar Keyboard ».

SAPPO e JEETATI : Hankadi a parií winndirde Pulaar. A weltanaama !

Yubbooji burdi waawde huutoreede



Windows



Mac OS



Linux



iOS



Android

Limoral faruwal

Wakannde haawniinde

So miwiyii ma wonde won do wakannde woni tawa ende loowi defte, heen wootere ina tonngi nguurndam maada fof, tawa woppaani hay piccal gootal. Gila ñalnde njibine-daa haa ñalnde nduttoto-daa, ende loowi sifaa no ciibortono-daa kosam muuynatnoodaa, ina winndaa e mayre no boje koomtiratno maa, ina he mayre kala konngol, kala durmaango, kala sañña-taango, kala dojjaango, islaango hebnoongo rewde e daande maa. Kala conndol meednongol hebde ma, kala muusalla, kala mbelamma, kala muuya, kala kebal, kala dawre meednoonde walla meedoore hebde ma e nguurndam maa. Ndeen wakannde a yidat ko yaawi yiyytude nde ngam widaade nde haa njiytaa ndee deftere haawniinde ngam yilmitoraade nde ko nguurndaa, teentji noon ngam diiranoyde kelle cakkite dee, mbele ada anndako araani tawo e nguurndam maa, hay so noon maa a hul hippitde hello wadftindiingo ngoo ! Maa mi hollu doo wonde ndee wakannde ina woodi, kadi nii ede keewi, de ngasataa, keeweendi majje ko kaadtari. Ko dee bakane buri boom limoreeje goowaade (hono 0, 1, 2, 3, ... ekn) heewde !

Ko adii nde eden ndallina goodal dee bakane kan e keewal mumen moolaangal ngal, njeewten loowdi ndi wootere kala e majje hattani loowde.

Mbiyen wonde kala deftere loowiinde e wakannde hee winndiraak ko alkule Pulaar capande tati e didi dee (32), wonndude e tobbere, e piccal e yolnde (woni mehum (ñalde) ndeddotooodum hakkunde kelme didi). Keben wadde jeloode 35 ceertude. Kawren e mbaydi binndol ngol nganndu-daa, kala hello (derewol) loowata ko gori 50, kala heen gorol loowata ko jeloode 100.

Jooni, so neddo yidii winndude jeloode wootere, omo jogii laabi 35 binndirdi dum. So o yidii winndude jeloode didi, o jogoo laabi 35x35 binndirdi dum, hawra 1 225 laawol. Ngam taroovo o ñura faamde, so tawiino ko jeloode tati tan ngoodnou, mbiyen de {a, b}, ina laabi so en njidii winndude jeloode wootere ko laabi 3 binndirdi njogi-dene, ngati maa wonii en cubiima a, walla b, walla b. Kono so en njidii winndude jeloode didi, keben laabi 3x3 binndirdi, hono 9. Diin laabi ngoni, aa, ab, a, b, bb, b, b, b, b. En paamii rewriwal ngal : kala alkulal cubangal e binndol gadanol ngol ina hawra e laabi 3 cubordi alkulal dimmal ngal, nde tawnoo ko alkule tati ngoodi, kala heen gootal hawra e cube 3, so rentinaama fota he 9. Hono noon ne, so en kuutoriima haralde men jeloode tati yero mbeeblinaangu nguu, eden mbaawi yidde winndude helmere nde jeloode tati, so en ndewii rewriwal ngal keben laabi 3x3x3 binndirdi dum, hawra 27 laawol.

So en njidii wadde helmere nde jeloode 10 keben 3x3x3x3x3x3x3x3x3 laawol, 59 049 laawol. Ngam weebtin-de tonngol hiisaaji ciforidi nii, hiisiwal ina huutoroo tonngi dabbii beeblinooji : fayannde ko dum woodiri. So 3 sowiima hoore mum laabi 10, dum tonngiree no weebiri 3¹⁰. Hono noon ne so didi sowiima hoore mum laabi 67, dum winndatee ko 2⁶⁷. Ko buri yaajde, so limoral p sowiima hoore mum laabi m, dum tonngatee ko p^m.

Ngarten e haralde jeloode meeden 35 dee, hono loownde alkule pulaar e tobbirde tati kaalaade dee, ngam winndude defte men dee. Nde tawnoo

kawru-den ko dow kala derewol yo gorol fof loow jeloode 100, oon sahaa eden njogii laabi 35¹⁰⁰ winndude kala gorol. Bayde noon kala derewol hawraa wadata ko gori 50, wadde njogo-den laabi 35^{100x50}=10⁵⁰⁰⁰ winndude kala derewol (woni kala hello). So en njidii winndude deftere nde dereeji 500, njogo-den laabi 35^{100x50x500}=35²⁵⁰⁰⁰⁰ binndirdi indeen deftere. Ngam weebtin-de hakkillaaji men no kebindorii mawneeki ngal limoral, tesko-den ko kanngal sebi limoral 10³⁸⁶⁰¹⁷⁰ ngal, hono 1 dewnudo 3 860 170 ndiga ! Ciftoren wonnde keeweendi mitte, hono atomaaji, nder faru hee fof, hono iniweer hee, tolpii koe 1080, hono 1 dewnido ndigaaji 80. Wadde dum feccinaami soynaade limoral keb-den wonande laabi binndirdi deftere nde 500 derewol dow huutoraade haralde jeloode yettu-den ndee.

Dum doo noon yidi wiye ko eden mbaawi winndude defte 10³⁸⁶⁰¹⁷⁰ ceertude, de 500 hello, tawa kuutori-den tan ko haralde 35 dee.

So en ngoniino balliyankoobe, mbiyen yo en ndarto doo; ngati dum ne fakiti haa heyataa e ko woodi koo fof, hono faru nguu. Hay so e pamditinii deftere heen fof haa fotii e mittre, ko cetta heen tan naatata e faru men, hay dum ko maa kala koode, kala lillude, kala daje, kala pecoron njaltinee, nde oon cetta waawa naatde!

Kono nde tawnoo hannde mbadaten ko hiisiwal, hay keeri faru mbaawaa hanndaade en, nde tawnoo eden mbaawi maandaade limoreeje burde doon mawnude; so maandaade, hiiso limoral kaadtaral e hoore mum!

Wadde mijo-den wakannde loowore defte men 103 860 170 dee. Heen wootere ina loowi ciimtol nguurndam maa, aan gondo etarde oo. Wodnde ina loowi ciimtol nguurndam maa tawa ina wadi saggere e derewol mum 430⁶⁰ ngol, wodnde ina loowi manojo kuccude e maa haa heddi hello 25⁶⁰ ngoo, ngoon ina wadi ñijooje maa. Wodnde ina loowi daartol Fuuta, ndeya haadi ko e Satigeebe, won heen wootere joodtirii ko Abdul Bookara fiyi Dodson, hefti diiwanuji Fuuta fof, hadi tuuba-kiri laamaade. Won wodnde ina sifoo Fuuta fof, kono wiyi ko bempeyYe njuumri ndegata e nehaande maayo Senegaal, won wodnde wadaani doon maayo, fawi doon ko jeereende, won keewde godde ñjanngotaako, heen wootere wadi tan ko alkulal ñ ngal ... En ngasnataa sifodaade de, ngati fannuji defte ko di keewal kulbiniingal.

Limoral faruwal

Jooni, ngarten e limoreeje caggal nde cifi-den wakannde men moolanaande ndee. Yetten limoral ngaldoo : 0,123456789101112131415... hono ndiga piccudo doggol limoreeje kibbe dee kala. E nder piccal hee wadde ina tawee kala limoral kibbal ngal mbaawden mijaade nde tawnoo ko doggol majje dakkondiraa heen. Ko hono ngal limoral wiyatee limoral faruwal. Limoral faruwal ko loowngal e tonngol mum kala limoral kibbal cubangal.

Tesko-den jooni wonde kala hito, kala ayaawo, kala alkulal ina tonngiree limoreeje, ko dum woni ko wiyatee limdinnigol, dum tammbii kala gollal ordinateer gollotoo. Wadde kala hito wullaango ina hawra e limoral kibbal keeringal, kala mbaydi nataandi ina hawra e limoral

Daartol : Wullum Seyki

Wullum Seyki (*Wul M'Seyke*) ko hardaane jeyaado he leñol Etfaaga el Kataat, he suudu Baarikalla en to Aksuus. Omo lolliri wonde tayoovo, walla "saaysaaye" tampinnoodo (kamminkoodo) yimbe, gaannunoodo laamu koloñaal.

O wuubotonoo ko he diiwaan Brakna e Tararsa, haa teenji he saraaji Boggee. O burnoo heewde yande ko he baleebé tan, ngam hisde e njoftiigu safalbe. Walla mbiyen omo faamnoo konngol biyngol « hab e gooto Alla wallu maa ». Ine wiye kadi huunde e safalbe Aftuut e Eeleega ina cuudatnoodo, caloo haaltude ngonka makko, sabu kulol... Wullum warii yimbe heewbe, o « heli koyde fulbe heewbe, o wari jawdi mum en ». Ko Wullum warnoo Hammadi Sireet Meel, o wari Ngalanka Gay to Aajilaan (*Aslaat*), o wari Sayiid wul Serña to Moyt.

Kono Wullum ina wonatnoodo saraaji Eeleega, Meel, nder Asaaba, haa Kaay. Omo heewnoo yahde Kiifa do o y'ettatnoodo njoobaari tawa o hulaani, walla e keerol hakkunde Barakna e Tararsa, heen sahaaji boom haa to Butelmiit.

Wullum Seyki ko dardaro, joom beccce jaajde, mo seerataa e saayaande mum mawnde. E sahaa nde o yiyletee ndee, omo soli ñiiy'e didi muuynirde dee, omo wadi aanoodde jaasi garde fiynoo mo e tuma nde o nannganoo, koyde dee ina mbadsi gaanoode ceenuuji jamde o tonngiranoo. Tuubakoobe mbiyi « kala do omo yaha tawata ko omo fiillii kaala haa yeeso makko majji. Omo yoyi haa o maayi, omo waawi welde yiyam so o wondii he yimbe, o wona e yimde, e amde, e jaarde nulaado... Heen sahaaji o wiya ko o siriif, o initoroo Abdallaahi wul Ahmeddu ».

Ewyide tuubakoobe, e fawaade e kabaruudi di birigajee garde rokki ñalnde 26 abriil 1950 : « Wullum ine joginoo wallidiibe laabtube : tillisa gooto to Meel, tillisa to Letfatar (to hardaneebe Ehel Baarikalla en), kam e sehil makko tiidbo biyeteedo Ahmed wul Aleya wul Lagalal to Kiifa, mo o wujidnoo fetel to Ayyuun, oon woni ballitoowo mo he kure e conndi ». Heewbe kadi ina nganndunoo Wullum no feewi, kono cuusaano haalde walla tawa omo moy'unoo e mum en.

Kono, e sahaa nde o yiyletee ndee, « Wullum ina jogitii fetel e kure mum mo o wujjunoo e capaato wulaad Ahmed en gooto, omo jogii wolweer, kam e karabin mo o wujjunoo e garde gooto to Ayyuun ».

Mawdo tunndu Butilimiit woondii ñalnde 28 sulyee 1949 « nanngude mo e fawaade e dii kabaruudi pooydi e nokku do o heewi mooftooobe, wonaa huunde newiinde. Buri moyvude tan ko warde oo saaysaaye bondo, tawa ine hunoo yeende, mbele safalbe leydi ndii, be nganndu-daa ko kam en tan mbaawata fottude e makko, ine mbaadda idii haaltude mo ».

Ciimtol Lietanaa Houmaire, kumaandan catal Rooso.

Etuugnaade e ciimtol liyetnaa Houmaire, gardooodo catal Rooso, Wullum wadii bonandeeji garooji dii : « Ñalnde 25 saawiyee 1950, o yanii e kippu PTT (poosto) peewnatnoodo boggol telefon hakkunde Eeleega e Misriyya, o bolii be haa be laabi, o ullii he sooynde ;

Elewru abriil 1950, Wullum fellii, gaañi garde serkal Ahmed wul Habiib jiylotonoodo dum, les tillisa to Mbuun.

Ñalnde 26 abriil 1950, he saraaji Meel, kippu gardeebe jirlotoodo (ine jeyanoo heen Hammadi Siree, Bookara Aamadu, e dowoowo biyeteedo Moym), fottii e makko omo waddii ngelooba. Gardeebe dido bee cuudii, neli dowoowo oo yo jaaboyo mo. Ndeen Wullum arii haa faandii be, garde biyeteedo Hammadi Siree oo felli. Wullum suudii caggal supoyuru, jaabtii, fidi garde oo. Bookara Aamadu, caggal nde safri Hammadi, yahi yewoyde ndiyam. Wullum taartii tulde ceenal, ari jokkiti Hammadi. O soonyii Bookara ine ara, o felli dum ; oon jaabtorii fotde piyande nayi walla joyi, fetel mum moccii, dogi suudoyii he teheende. Wullum kañum yahdi e fetel Hammadi e kure 5 walla 6.

Ñalnde 4 mee 1950, wullum wari Ngalanka Gay to Aajilaan.

Ngam dartinde golle bonde WS wadata dee, laamu koloñaal ummanii mo. Ñalnde 5 mee 1950, tunndu (serkal) Barakna kam e tunde catiide dee, mbadsi jeejee juumtudo e warngó Wullum ñalnde 5 mee 1950.

« Mi yahii Eeleega ñalnde 5 mee, mido wondi e maresaal loji Ber e gardeebe baleebé 6, nelan-mi gardeebe safalbe 20 to Butelmiit. Feere sakkaa ngam ndeenka diiwaan Barakna oo : gardeebe safalbe 30, gumiyeeji 20, kam e yarlitiibe. Bulli e boyli diiwaan Giimi, Tashot, Meel, Aajilaan, Eeleega ... ndeenaa. Seteeji reenoobe yirlotoobe mbadaa he keeri diiwaan Barakna oo kala, tawi ko baddiidi wallajahroo koyde. Losko wadaa do tuddunde Jamaariik en do Aajilaan doo, do warngó wattindii wadde doo. Ngo yuumti e tuumgol yimbe 9 jeyeede e wallitbe warngó ngoo. Widto ngoojokki, kono, ine jeyaa e ko telbini ngo, keewgol wiyoobe njiiyi saaysaaye oo, tawi ko he nokkuuji dii fof, laawol gootol. Kikiide 12 mee, laakta-den mo to Mederdara, e to Butelmiit.

Ñalnde 13 mee Wullum wari kadi garde serkal ine wiye Sayid wul Sereña to Moyt subaka law les tillisa, caggal duum o wari geloodi didi, o nawori ngoota, o yirbani rewo. Kabaaru oo hebaa ko feccere jamma, ñalnde 15 mee. Doon he doon postooji Meel e Giimi tintinaa.

Ñalnde 16 mee dañbu-den yo gumiyeeji 30 nelde to Barakna, faade Giimi, do sikkaa Wullum ine waawi nanngude (Meel, Lettar, Giimi, kam e bulli). Batu ndenndinngu kumaandan serkal Barakna e Tararsa e Gorgol, yantude e ardiibe tay're Misriyya e Boggee joodiima ñalnde 19 mee to Eeleega. Ñalnde 21 mee, waktu 8 subaka, min kabraa Wullum waraama. Nii woni min ngari, min yetti mo, min nawi mo Eeleega, anndube mo teentini ko kanko tigi woni doon, o wirnaa sara Eeleega.

Widto wadaango ngoo wiyi ko nii o wardaa :

Wulaad Biri en tato (3) yiylotonooe geloodi jarli nguyjanoodi potti e Wullum ine wondi e dendum Siidi wul M'seyke les lekki. Be njee-tidi e makko ko juuti, caggal dum be ndeeyi, be nanondiri nanngude mo. Kikiide mum, tawi dendiiko oo yahii ko ina wona waktu ko adii duum, be njahdi e makko fotde 400 meeteer, gooto e mañbe girbii saayaande makko, didabo oo wiyi ina nannga junngo makko ñaamo tawi Wullum sortii wolweere mum, kono tawi tatabo oo girbiima fetel makko, felli mo hade makko fellude wulaad biri en tatobee. Fetel (model 1916 AC 71-792) mo o wardaa oo, jeynoo dum ko tuddunde gardeebe tay're Eeleega.

Tesko : nanngugol Wullumjuutii, metti, sabu dalillaaji keewdi

1. Nokku do o yirlotonoo doo ine heewi ledde, ine metti yahde, ine heewi cewle ndiyam, pele neddo mbeebaani maanteede doon;

2. Koreeji makko mballitii mo no feewi sikke alaa heen, be njabaani rokkude kabaruudi, walla hay so be ndokki tawata ko kiiddi.

3. Wullum ine darjunoo no feewi, tee ine hulaa. O wiyatnoo ko hay huunde waawa yettaade mo, tee omo wasoroo dum. Omo joginoo daabaa jaawdo, mettudo yahdude saka kebetaade.

Gede didi ine njeyaa e newnude jaggugol Wullum : 1°) njeenaari ujunnaaje noogaas (100 000 francs) e 2°) jowgol njöödi ardiibe haa nde Wullum nanngaa fof. Duum yanti e peeje ndeenka cakkanoode dee. »

Ciimtol Lietanaa Houmaire,
kumaandan catal Rooso.

Kanko lietnaa Houmaire o siimtanii Guwerneer Muritani to Ndare no gede dee kala njahri nii, haa teenji no Wullum wardaa nii, o dabbii e mum nde rokkata wulaad Biri en warbe Wullum bee njeenaari ndii, ko jiidaa e rokkude dum en kabirde tawaafe e Wullum dee, hono ko fodonanoo kala nanngudo Wullum nii.

Wullum maayri ko duufi 32 fat. Warbe mo bee mbiyi, nde o fellaa ndee, ko konngol gootol yalti he hunuko makko « Alla ko bajjo ». Be mbiyi, o hebiino wiye be nde be ñaldi ndee wonde o woni ko e « jihaadi feewde e raneefe e kala wallidiibe mum en ».

Bookara Aamadu Bah

KAALDEN GOONGA

Pulaar ene wiya : « so neddo tafatno hoyre mum, yeenjinta ko kanje ». Nde tawnoo gooto fof, so wonii e nder fasbe mum, yidata ko faddude. Tawde noon « ko gable tawata gabbel nde muudo yona », wadde ko neddo tawtondira e neddo goddo nde dental wooda. Dental noon ene wooda, tawa wonbe e mum njokkondiraani. Ko duum woni ko humpitibbe ko faati e dente mbiyata « teelal denndangal ».

Ngam paamen ko dum firti, ndokken yero dañbo, hade men artoye heen e binndande garooje, so Joomiraado haajii. Yero oo ko huunde kewa, be funnaange pottita toon e be hirnaange, be rewo tawtondira e be worgo. Gooto e men fof ari ko humpitaade ko wadi koo, kono haaju mum alaa e ko addi goddo oo koo. Eden nganndi sinno ko fedde yubbunde, wonaa noon sifortoo. Fedde, ko mijo wooto addi en, kono oo yero mo ndokku-den, gooto fof ko muuyo mum addi dum, hay sinno ko en rentube do gootol.

Ko duum addi konngol « teelal denndangal ». Ko naatirka tan wonnoo, kono wonaa duum woni hannde yeewtere men. Yeewtere men, ko neddo tawii neddo, wiye dental. So tawii ko yimbe renndube pinal, demngal, fakko, aadaaji, donaadi, iwdi walla neesu, ekn..., mbiyen dum leñol. Tawde Pulaar wiyi ko « so neddo tafatno hoyre mum yeenjataa ko kanje », wadde kala mo ene haala haala leñol mum soofnataa, sinkat. Sabu jeeyoowo dene jiddo jarnude oo wiytataa « ngaree kaadde nani ». Ene gasa tawa ko ngoon muuyo yidde wiyeede ko kanngol faddi ley'i goddi, buri dumen alduude e yonteede addani fulbe nanngitaade e ko keew-den nande ene haalee, woni « HARAMEEJI JEETI'DI ».

So tawii en njabii ko neddo tawata neddo nde wiye leñol, so tawii kadi en njabii « neddo ko kullel keewngel wutteiji, baylotoongel ». Wadde leñol ne en foti waylaade, sabu eden keewi hande, so woodii biydo « aduna wayliima », wodbe mbiya alaa « wonaa aduna oo waylii, ko yimbe bee mbaylii ».

So en nanii waylaare yimbe noon, ko jikkuuji mumen walla aadaaji mumen, sabu eden nganndi e aduna keso oo, pine e neesuji fof ko ko njul-yultondiri. Wadde, naamno-den koye men, hay sinno dii harameeji jeedid'i ngoodiino ne, mbele edfi lutti woodde haa jooni ? So en paccirii ko paam-den e harameeji dii koo, haawnaaki ndañen jaabawol dee naamne :

1. Haram gadano oo, ko " min ngujataa "

Sikke alaa, eden nganndi wujjude, ko yeftude ko jeyaa, tawa ko e suuñnde. Ko duum wadi Pulaar wiye, kala ko gujjo haali ene yeddo haa heddi konngudi tati « nde ngarat-mi ndee mi mooyti ; nde mbiyaa-mi holi oo, mi dog ; nde njagga-mi ndee mi fiya ».

2. Haram didabo oo ko " Min penataa "

Eden nganndi, fende, ko haalde ko wonaa goonga, ko laabaaka, walla haaltude ko ñuumbananoo. Alla yidaa, ndimaagu faarnortaa-ko. Duumiido heen fof ne kay heewi ko wonde koydo e nder renndo ngo woni ngoo.

3. Haram tatabo oo ko " Min Kulataa "

Eden nganndi, hulde huunde ko reentaade dum, sabu mum yeanneede ko ndeen huunde waawi dum, tee ene waawi bonnande dum ko waawaa feewnitande hoyre mum. Kulol noon ene hebtiniree kadi waasde haalde nde fotnoo haalde, ñuumboo, walla gijeede doga, walla riddeede suudoyoo, walla naamneede ko haalnoo yedditoo, ekn.

4. Haram nayaabo oo ko " Min njamfotaako "

Jamfaade, won wiyoobe dum gunndaade. Te mawdo Jibi Hammee Lih (yoo Alla buuban dum) meedii wiye, helmere gunndo firdeete e arab ko sirlu. Sabu sabu sirlu ko Arab. Maanaa oo hawritii, sabu fof noddi ko ko mooftaa yaltaani booval. Wadde jamfaade, ko wadde walla wiye neddo goddo ko boni tawa tinaani, tawa kadi fayndaare baddo oo ko humtude haaju mum, walla bonnande mo jamfii oo. No jamfortee nii noon, ene heewi sifaaji, te ko dum jibinta koo kadi ene heewi mbaydiji. Mi sikkani so tawi ene jari rokkude yerooji sabu waasataa, e kala sahaa, eden njiya ko wayi noon.

5. Haram joyabo oo ko Min tayataa endam

Won do Joomraado wiyi, «kala tay'do endam, Mi taya dum». Eden nganndi, tay'de endam ko seerndude wondunoobe ceerungal bonnande, ko wadde haa weldunoobe mettondira, haa jiidunoobe mbonondira, tawa kadi fyndaare joom mu tan ko bonnude ko waawaa feewnit

6. Haram jeegobo oo ko Min pirtataa aadi

Firtude aadi woni yowondireede e konngol, waasa wadde dum tawa tintinaani mo yowondirnoo oo. Ngonkaaji keewdi ene caaboo dum. Ene heen sikkitaare, hulde, mooftude jamfa, fende (sabu joom mum, gila ene haalde, ene anndi wadataa), nan-nanti, ekn...

7. Haram jeedibo oo ko Min dawataa

Dawde noon, ene noddi ammbude. Woni dañde waasa yedde heen mo fotnoo yedde. Pulaar ene wiya doon «so koddiido maa warii ñiwa dawii ma, so a ronkaani eggu, sabu hodde gooto buri koddiido bondo gammbo». Dawde kadi, ene firta dañde kattande wallude goddo, ruttoo hada dum.

En ñaagiima yaafuya, so tawii ngoo doo facciro ene njakki. Fayndaare ndee wonnoo ko siftinde anndunoobe e naamnaade en, «mbele dii harameeji jeedid'i ene ngoodi hannde e nder leñol men hee». Kalajogiido heen jaabawol yoo wallu en, mbele ngannden no njoodori-den.

Be bowdi buri horsinde ?



Nde haaliino kadi ko faati e gaas karboneejo (CO_2), asid kocceeo (*acide lactique*), walla iiree (*urée*), gede keewde ardude e warñeende... walla kadi noordi comci neddo boornii (ko bawli walla wojji di buri waawde yiye ekn...).

Jooni kadi, won widtooji teentini keewgol « biimtagol gaas karboneejo, ine jeyaa e gede burde waawde foodde bowdi ». Ngoal biimtagol noon, baade ko haala yimbe kaalaten, ine jotondiri e foofaandu kam e warñeende. Wadde naamnal men haa jooni ko « hol guri (balli) bowdi buri horsinde ? »

Gaas karboneejo (CO_2)

Ngannden bowdi ine uree gaas karboneejo fotde 50 meeteer ngodddeki. Duum wadi, yimbe burbe waawde wiimtinde gaas karboneeje (he foofaandu walla he warñeende) buri heewde ñateede bowdi. Ko duum kadi saabii, debo-deedi en (wiimtnoobe gaas karboneejo fotde joyabal dow ko heddiibe bee mbiiintinta) buri heewde ñateede. (njeñtudi widto yaltungo e jaaynde ne wiye British Medical Journal e hitaande 2000).

Kono noon, doo, maa paamen kadi, « burgol waawde ñateede ngol ine fawii e no gooto fof tinirta ñatgol bowdi ngal ». Ine wadi yimbe be keewaani tinde ñatgol bowdi, walla mbiyen ñatgol ngol battintaa no feewi e guri mum (ñato-ñato...), be cikka be ñataaka. Ine wadi heen kadi, kala ñatannde bowngu ine battina e balli mum en (ñato-ñato keewdo, puyé ekn), haa be cikka ko kambe tan ñatetee.

Dum noon adotoo foodde bowngu, ko uurol gaas karboneeje. Jooni noon, so ngu arii haa ngu yettiima, ngu subtoo fawaade e gede godde, ngu fellita ñatde walla waasde ñatde. Ngu subtoo « joom balli burtudi en », walla « wonnoobe e softinde balli mum en (dillatnoobe) », walla « yarbe (haa teentji ko wiyyetee biyer koo) : dee gede fof noon ko beydooje nguleeki balndu kam e biimtagol CO_2 . « Kono, ko uurngol buri heewde foodde bowngu. Tee bowngu ine waawi seerndude fotde 150 uurngol balndu ».

Kono neddo fof ine jogii henndu ndu heerorii ; duum wadi weebaani anndude hol heen ndu bowdi buri horsinde. Henndu nduu kadi ine waawi nii wonde henndu bakteriji guurdi he nguru balndu neddo, tee hay gooto jiidaani e goddo oo ko roondii e bakteriji, bowdi dii kadi ine njogii bakteriji di buri horsinde henndu mum en... Yeru, hollaama leñol bowdi biyeteengol « Anopheles gambiae » taweteengol he Afrik, buri horsinde ko yimbe be balli mum en ndoondii bakteriji keewdi, kono di ngoddondiraani leñol. Kono haadaani doon tan, keneeli balli men ina mbaawi fawaade kadi e donte (gènes) gonde heen.

Ine wadi kadi bowdi di annoore foodata : duum wadi ine woodi bowdi ñatooji jamma, ñatooji ñalawma, ñatooji jamma e ñalawma ekn.) Ine woodi bowngu mbiyeteengol bowngu kata-maawu (moustique tigre : Aedes albopictus), « ñatooju ñalawma, haa teentji noon weetndoongo walla mutal naange », ngu wondaaka dum noon annoore. Ko noon kadi, bowdi ngondaaka too-weeki. Hay so tawii noon bowdi pidooji yimbe dii buri heewde wonde ko les (do buraani meeteruaji 7 toowekki), duum hadaani di taweede to taakaw 21°C , to taakawuuji nana to Sinngapuur, walla 2 500 meeteer dow haayre Himalaya walla 500 meeteer neder leydi, neder gasde oogirde to Inndo...

Kono kadi bowdi ine mbayla jikkuuji mum en haa njahda e aadaaji yimbe. Duum teskaama e bowdi gaddooji paawngal dennge. Yeru nde yimbe mbadti huutoraade arkillaaji cuuwaadi posone tan, bowdi dii mbadti arde law ngam ñatde yimbe, ko adii mutal naange, dum noon ko adii nde arkillaaji ndiiletee... Teskaama kadi, bowdi coomdi dennge dii buri yidde ñatde ko yimbe be ngondaani heen ; noon ne, bowngu ngu roondaaki mboros oo buri yidde fidde ko neddo ñawdo oo...

Bookara Aamadu Bah

Cellal e rafi mo demngal Pulaar jogii he nder laylayti renndo

No demfe keewde nii, Pulaar ne jeyaa ko demngal guurngal he nder laylayti renndo. Nguurndam dam ina waawi jogaade sifaaji keewdi :

1. Sabu yimbe bee waasde dumen wonde jann-gube demngal ngal kañum en fof ;
2. Sabu baasgol fotde tolno e humpito.
3. Ko nokkuuji e nehaade ceertu-de tawndir-de e nder dingiral gootal.

No duum wayi fof Pulaar ina yetti Allah no feewi, sabu ina teskaa hannde yonta oo ina reerdi e binndol demngal ngal. Ko noon ne naamne jowiide e coñce haa taarikaaji leñol ngol, duum ina wuurti no feewi e nder laylayti dii.

Gagga mawdo jogaado heen tan, ko nde wonnoo jaangubé lugginidinibé e demngal ngal keewaani e nder dingire hee, sahaa kala naamne lugge toddiide demdiyankaagal ngarat ndonka jaabawol. Walla nii heen sahaa jaabawol hebee tawi nootaaki he maanaa cañu helmere ndee to demdiyankaagal.

Yeru:

Ko allah tan danndi mi.

Heen mbiya allah wonaa tan, e dow mijaade tan oo ko pamfingol allah.

Oo tan, ko oo teentinirgel no yoga e kelme e alkule teentinirde.

So tawii ko ko famdi haalee, o teentina pamfugol.

So tawii ko ko mawni, o teentina mawnugol.

Cadeele dewde heen ko cadeele paltagol kelme e kuutorde jiggaade.

Yeru kelme:

- Jarabi
- Ndewnel
- Takannde dow e takannde les ekn...

Kuutorde:

- Wutte
- Coorumbal

- E yoga e ko tawatee e jimdi awlufe e cefi subalbe.

Ko heewi e kelme nani wiye hannde ko jigaade, haa so booyii wayata ko no, ko enen tan ngori jiggotoobe kelme nii.

Tawi kala ley'yi koddudi, njiidi pinal walla taariik. Diin ley'yi ina mbaawi raabondirde gede keewde ko wonaa tan demngal kaalateengal.

Edi ndaabondira he demngal, boornateeri, ñaamdu haa e pijirloozi.

Kala heen noon kojuuti, booyi, ina waawi dolee haa yimbe koroo anndude leñol jeynongol dum.

Kono ngam fellitde ñaawde heen huunde ko fulbe njeyi walla njeyaa, yo a taw joomum ko karallo e oon fannu.

Sabu kala ko neddo haali nanaa, ina waawi jabee. So jabaama hawrii e wonaa ko woodi, ina waawi wonande demngal ngal e pinal ngal ustaare nde weebaani feewnitde.

Daawuuda Sammba Ndonna

Limoral faruwal (jokkere hello 5)

kiñbal mum, kala binndol ne ko noon. Ndeen noon so limoral gootal loowii limoreeje kiñbe fof, wadde ngal loowat kala mbaadiiji, kala ayawuuji, ngal moofta kala hitooji e kala binndi. Wadde ngal loowa kala ko meednoodo walla ko meedoyoowo wuurnoo walla ko o wuuroya, gila e ayawuuji mum, haa e hitooji mum, haa e binndi kaalooji ko wonaa dum. Kono haadaani doon tan; maa ngal loow kala ko woodi no woodirnoo, kala ko woodoya no woodiroya. Kono ngal haadaani doon tan, e ngal loowa deen gede fof e baylande mumen, ngal loowa wadde kadi ko woodaani, ko meedataa woodde. E yeru, engal loowi nguurdam maa fof, kono kadi engal loowi nguurdam maa fof tawa engal wayli heen yettoode maa, walla ñalnde njibinedaa, walla didi dii fof, e ko wonaa dum. Ngal limoral wadde ina loowi wakannde men dow too ndee.

Tawee dee limoreeje ina mbiiy'a nder kuubal limoreeje laabde. Tawee ko kañje buri heewde e limoreeje kiñbe. Eden mbaawi dallinirde dum no weebiri : ndewan dee többe didi :

1. Ko adii fof kollen wonnde limoreeje de tonngol loowngol A e B (doggi A-B) de njuiteendi haadtari buri heewde e limoreeje kiñbe. Daliilum mum ko hujja palal Kantoor. Mbinnden ngaldoo cawndondiral hakkunde limoreeje kiñbe e diin doggi :

0 : AABABBBAB...

1 : BBAABAAAA...

2 : AABAABBBA....

3 : BAABAABAA....

....

So tawiino doggi loowdi A-B dii poti e limoreeje kiñbe hono {0, 1, 2, ...} keeweendi, kala doggi A-B cubangol maa tawe ina hawri e limoral kiñbal gootal. Hono no AABABBBAB.. (doggol gadanol ngol) hawriri e 0 nii. Jooni noon eden mbaawi fentude doggi A-B tawa kuutori-den ko palal fiodowal dow doo ngal : En yettat palal ngal lomtondiren A e B, keben BAAA.... Ngoldoo doggi nanndaani e hay gootol e limtaadi dii,

engol seerti e gadanol ngol tergal 1^ogal ngal, ngol seerti e didabol ngol tergal didmal ngal, e hono noon e hono noon. Wadde wona doon ko doggol ceertungol e limtaadi dii fof, wadde ngol tawetaake e majji. Oon sahaa noon, keben wonde limoreeje tonngiraadi doggi loowdi A e B buri limoreeje kiñbe heewde !

2. So dum yawtii, yetten limoral faruwal ngal kolluno-den dow ngal, hono 0,123456789101112131415161718192021.. . Yetten doggol A-B. So ngol fuddorii ko A, lomtondiren nder limoral faruwal ngal 1 e 2 (woni lime didi gadane caggal piccal ngal), so tawii ko B dacciren noon. So alkulal dimmal doggol ngol ko A, lomtondiren 3 e 4 nder limoral faruwal ngal (hono limal tatiwal e nayabal nder faruwal ngal), so dum alaa dacciren noon... njokken ngaal gollal. Nde tawnoo doggi kuutorto-den ngam waylude faruwal ngal ko keewdi haa buri keewal kiñbe, etee kala mbaylaandi maa addu limoral kesal, wadde keewal kese dee maa fot e keewal doggi A-B dii, oon sahaa de bura kiñbe heewde. Jooni noon tesko-den kala heen mbaylaandi addata ko faruwal ! Wadde limoreeje faruve buri heewde e limoreeje kiñbe. En ngasni daliilu oo.

En njiyi ngalu mawngu suudiingu e ganndal limoreeje. Limoral faruwal ina moopti faayidaaji keewdi pattamlami. Limoral bayngal no pi, lol-lungal, ciekngal keeri nderiwi hiisiwal ina tuumaa ko faruwal, kono hay gooto waawaani tawo dallinde dum. Maa en ngartu e kaawniide jotondirde e nde kollir-den doo ndee e binndande garooje.

Kelmeendi

Limoral faruwal

nombre univers

Limoral kiñbal

nombre entier

Fayannde

puissance

Faru

univers

Dajre

planete

Rewriwal

logique

Muhammadu Faalil Sih

Dendiraagal

Addannoo mawbe men Afriknaabe yubbinde ko ngam newnude nguuriigu hakkunde yimbe, niibnude korsa, tabitinde banndiraagal e njurum, e nder wuurdube e yonta gooto. Nde tawnoo neddo wuuri ko e dunndu ngoodelaaji fiiliindu dum, tuugaade e duum, e hollude kadi neddo fotaani fawde nguurdam mum fof e dañal, sabu dañal jawdi, ndariindi walla leliindi, wonaa ndiintan, neddo faggotoo hebdja jam. Jam e dañal pawii ko e jinsondiral gede. Potondiral mumen. Raddude jawdi, walla no wuurdji, ngoo senngo, neddo e kullel fof, walla mbiyen tan kala tagoore poti heen haaju. Nde tawnoo kala ko sooraa fittaandu wadi teewu e Yiyam ina hatojini e ñaamde e yarde.

Dañal ngal ko ko lelnanaa sardiji, wonaa o hajotini e ko godfio jogii tan o wadtii e jeyi makko. O dillintu sabaabu pawiido e sardiyeji laawdinaadi di renndo walla diine walla laamu dotti. Kulle ladde noon, diin sardiyeji tawaani dumen. So keydii tan, ndaddoytu njiiloyoo ko ñaami. Mbaree heen, Mbara heen.

Dañbude no wuurdje ina waddii en, Kono noon, Alla dottaani doon nguurdam neddo tan. Sabu so ñam haadji doon, ñam tekmat, ñam welataa.

Jawdi tan boldi waawaa tammbaade jam Aduna oo. Ko duum wadi, Alla yamiri en yo en njokku endam, yo en mballondir, yo en korsondir, njurmondir, njokkondir endam. Yo en ndeen endameeje men. Ndee doo yamiroore alliyankoore, ko nde

waddiinde reende e doftaade. Mawbe men mawnini nde haanjaggiri nde no wooturu e jookli Lislaam.

Alaa ko buri jaggude dam, ngam hollude no ñam foti mawnude e mañbe, e yidde wuurnude dam. Ko duum wadi dendiraagal lelnaa e mbaydiji keewdi, ceertudi sifaaji, dum laatii ngalu renndoyankeewu ngu hay gooto waawaa hiisodaade ñure mum e nafooje mum.

Anndube heewbe ina kawri e wiye so diiwaan Sene-gammbi oo deeyii, deeyni ñam konjubbudi dendiraagal taweteendi e banngeeji renndo fof. Ina jeyaa e majji :

- dendiraagal jettoode
- dendiraagal ley'yi.
- dendiraagal fedde dow e les
- dendiraagal fedde rewre e fedde worde
- dendiraagal biy-debbo (kosam) e biy-gorko (duhol).

Sifaaji dendiraagal dii, kañji fof e seertude, gooto heen fof, gootal heen fof won ko gollata e renndo ko jiidaa eko goddo oo wadata koo. Kono kadi, kañje fof faandaare majje ko welnude nguuriigu hakkunde renndube yonta walla soorube ndendiraagu walla jiidube endam. Sifaaji dendiraagal fof e seertude, ina jeyaa heen ñifde fitina, kono kadi ko moy'ude nguurdam buri, faddaade cadeele, newnude jokkondiral buri tabitde heen.

Fulbe, alla e mumen teddinde denndiraagal, tuugaade e widtooji Professeur Saydu KAN, (yo Alla yurmo

dum, haarna dum Aljanna), o wiye Fulbe ina njogii 36 leñol ngol ndendondiri e nder Reedu Afrik. Ko duum wadi, be booyi hoddude koddigal moy'yal hakkunde mañbe e ley'yi keewdi e Afrik.

Ndiidoo njubbudi nguurdam noon, wonaa njiggaandi, ko mawbe men cosani dum koye mumen, sabu ebe paamnoo no feewi "Aduna wonaa laalo, kono ko maa laalndee".

Haajooni, so leydeele Afrik bannge hirnaange ndeeyii, deeyni dumen ko dendiraagal. Fitina hakkunde ley'yi nanaaka tawo e majje. Laamuji dii fof e waasde daranaade potal. Sabu di potndaani besngu majji. Duum noon, wonaa wallitde ñiibal jam. Kono ley'yi dii ina nooynii, paalkisii duum. Di njaggi ko ko renndini di koo, buri mawnude e heedi-heeda mo laamuji dii mbadata oo. Kono jom hakkillaaji en fof, ina paami ñiibal jam leydeele hirnaange Afrik, hakkunde ley'yi, wonaa laamuji dii ngaawi ñam. Duum ko maamiraabe walla keltinofel en, goddo alaa.

Ndeen noon, en kebii ndonu mawngu e maamiraabe men, ngu en ngalanaa jawdi, e coodgol mum, sinno soodeteno. Kono soodetaake. Alla e dendiraagal leYYi mawnude e renndo, ina foti hesditineede sahaa e sahaa fof. Hono no dendiraagal biy-debbo e biy-gorko hesditinirtee e juuldeeli nii.

Tawde en kaalii, dendiraagal kosam e duhol, ndeen noon...

Aamadu Tijjaani KAN

doosdiyanke, widtiyanke, kebloowo hebloofe.

Labbitingol tagegol Aadama (5)

Njokken winndannde tonngodee 192

Eden njokka nguurdam baaba Aadama (JKM) fawaade e winndiyankoobe adiibe.

Hono winndiyanke Saalabi wiye : "ko refte e duum, ko Geno toowdo Oo, lonngini Aadama (JKM), yo eggli leydi, faya Makka, o wangoo e suudu nduu, naamindoo dum yaafuya, O yaafuu dum pergitte mum. Wiyaama kadi o jippinii hayre jalboore ummoriinde to aljanna, nde ina tolnoo e njaajeendi Kaaba ko dum woni nokku lom-tindordo daneeo ko geno foocci dum, bœydi njaajeendi leydi, hono no dum ardi, o wadi nder majjuum lampaaji kannje ina njeynoo ngam bœydude annoore. Caggal duum Geno neldi Aadama maleyka mo ina dowa dum ngam anndinde dum laawol feewde Makka. Maleyka oo jippii jippodii e sawru juutndu ko ina tolnoo e diraaje noogaas, nduun sawru noon ittaa ko e ledde aljanna. Edow dumdooina wayi no hankadi Aadama dañii ko yahdi e dow leydi, dum woni kala do o rewi, doon wonta wuro. Ko nii o yahri haa o yetti Makka. Nde o yetti Makka ndee, geno lonngini Aadama yo wanngo suudu nduu, o joofanii Aadama nokku oo, Aadama wanngii suudu nduu laabi jeedidi wondude e kolndam, omo heddi hoore mehre, ko dum wadtta sunna hijjoore. Nde Aadama wadi deedoo gede fof, Geno yaafii mo pergitte makko, o jokki wadde duum haa dum wadtindi hankadi, kala baddo duum yaafee bakktuuji mum.

E haala winndiyanke oo, nde joomiraado yamiri oo Aadama (JKM), yo yaltu faya Arafaat, Aadama yalti fayi toon, daria toon, o tinaani tan haa Hawaa feeñani mo doon. Ko doon be kawri e dow haayre ndee. Tuggi ndeen haa jooni ko duum wadi juulbe mbadti juulde doon e dow haayre ndee, dum jeytaa e sunnaaji hajju. Kono ko addani nokku Arafaat oo wiyeede Arafaat ngam ko doon Aadama e Hawaa potti, njiyontdiri, gooto e mañbe kala heftini goddo oo, anndi ñam. Caggal duum noon Aadama duumima do Makka doo dumunna juutdo, o ummitii doon o faati leydi Inndo kanko ejom suudu makko Hawaa.

Jooni noon alaa e sago ngannde ceertugol Hawaa e Aadama no foti duubi ? Be mbiyii ko dum duubi teemedde joy. E nanalla kadi wiyaama, nde Aadama yalti Aljanna ndee, o suuriratnoo balndu makko e terde makko ko cate e beremrefi ledde, kono nde o yahi e nokku baddo yooro ndee, ko dum wadi cate dee e beremrefi dii o suuritonoo dii mbadti yoorde e balndu makko. Ko ndeen o wadti boornaae ko nafata. Hay duum ne haadata tan ko e wadde ngemmbe walla haddaare, ko dum tagi dum wonti aada Inndo en heddaade balli boli so wonaa kaddule. E nagaaldoon teddungal Aadama ummingale Geno jom baawde oo, leydi Inndo ndii wadtii tobde no feewi, ndi wonti leydi kecidndi. Caggal duum, Geno jippinani Aadama cowi tawa ko gede guurdude ko wayi no baali e bey, yo o ñaam teewu maaji o yara keddama majji, o holta e leebi majji. E nanallaaji kadi, Aadama dabbii e Geno o wiye : "eehey maa joom-am, miin dee, mi anndaa waktuji, hol no ngollortoomi ?" Doon e doon Geno jippinani ngoriyal mawngal danewal tal, ngal foti ko no ngaari nih. wadti so o daaniima haa o haarii doryngol, haa dum hawrii e subaka, so ngoriyal ngal nani maleykaaji no ndewa Geno to dow asamaan, kanngal ne ngal jogga ngam anndinde yimbe waktu rewde Geno yontii, kambe ne be ngannda dumdooina waktu dewgol Geno, be ngummoob be ndewa Geno Toowdo Oo. refte, ko Aadama lori ledde, asi boyli, mahi galle, caggal duum, geno jippinani Aadama noogaas e goo deftere, kañje fof ede kadi ñaamgol jiiyba e Yiyam e teewu mbabba tugal, e ko jiidaa e deen gede, be mbiyi, firti deftedee, ko Geno jippinani be alkule noogaas e jeenay, be njannginaa duum, ngam wadi noon ko duum addanta be waawde janngude defte.

Mijo : Doosde mbinndiin "ñande"

ÑANDE...

Lañbinde mbinndiin helmere "ñande" ko huunde jojjunde, nde tawnoo musidbe heewbe hannde njahri winndirde ñande ko ñalnde. Mbele ina wellira no be ngaadorii winndirde nii walla alaa ? Jaabawol.

Min, e yiyannde am, helmere, nde foti winndireede tan ko no nde naniraa nii. Sabu no nde nanirtee nii, ende jogii maanaa mayre keeriido mo jiidae hay helmere wootere wodnde.

Ender renndo haaloobe pulaar, kala nde mbiy-daa ñande, hakkillaaji fof ndoga ko e ñalawma kuurdo mo njid-daa heertaade, ngam siforte mo, maantaade mo, yeewtude e makko.

Dum jiidaa hay huunde e ñalnde, sahaa dottaado, ummaade e beetawe haa takkusaan, mo yimbe walla neddo arata nootaade nootaango teddungal e noddaango gido mum, banndum.

Wadde to bannge jaajgol sahaa ko "ñande" buri yaajde e "ñalnde". Jooni noon, hol no njidirten yo mbinndiin ñandelomtine ñalnde, janngiree kadi ñande? Kala nde helmere ndee waasi winndireede no naniraa nii, ko alaa e sago iwdi helmere waawa labbindeed haa laaba, dallinee kadi sababu caamgol maggol walla majje. Sabu e binndol, tawde fof fawii koe doosde. Ko e dallinordee joorde kos tan neddo foti tuugaade ngam riiwtude walla tabitinde.

So faaynditaa heen ko yidde doftaade e reende dadol. Ina moy'a anndee, dadol ñalnde e hoore mum, wonaa : ñal, ko ñall, hono njogor-den yiyroyde dum e yerooji garooji dii. Ina moy'a ciftinen winndirde ñande, ñalnde ina sarii no feewi e dii duubi e

renndo janngooße e jannginoobe pulaar. Iwdi mbinndiin oo ko to janngiyanooße pulaar Muritani ummorii en. Mido joortii faandaare mañbe heen ko yidde reende dadol, hono no be mbinndirtunoo ndeen dewbo, guyjo, lawbo...

Ina gasa tawa kelme battindiide dee, mbaadtii winndireede no nanirtee nii.

Woni doo e yiyannde am ko yidde teentinde dadol helmere, e añde alkule maggol mbaala ladde. Woto woppu hay alkulal gootal waala ladde koy musiddo tawde ko a didiyanke ! Maa a jaabo, mbiyaa doo ko ngada-beño woni doo, haawnaaki !

Ngarten e badal ñallude, ngam baditaade dallinordi mbinndiin ñande, badtaado ñalnde.

Badal ñallude ina heewi calsaltiri to kelme baylotoode e mahdi jaltude e mum, tee wonaa kañje fof ndenndi dadol maggol. Ndokken yero :

ñalaande

Ñalngu

ñalnde

ñallal

ñalawma

ñallaangal

ñaltaari

ñallirkı

ñande ?

So en tonngii mahngoo kelme baylotoode e mahngoo, e to bannge doftaade dadol badal ngol, en tawat, e dee kelme 10 joodtoraade ko e : ñallude njalti :

- heen 5 ko muumal gootal cakkitorii: /I/

- heen 4 ngaddi muume 2 dee fof: /II/

- helmere wootere sikkaande ummii ko e ñallude, addaani hay alkulal gootal muumal e woortoode dadol

mum, hono : ñande.

E teskuya am to bannge mahngoo kelmeendi mbayoondi e mahdi ngiwndi e bade, so nde samminii alkule dadol ko gootal tan helmere samminta walla sowa. Kono momtaataa haa laaba.

So en koddirii ko nde helmere waylotoonde e mahdi, askitintoonde e badal ñallude, ndeen noon hol innde mayre to keewal ?

Ko goonga demngal pulaar ko demngal dadiwal. Kono dadol badal faayienda mo jogii oo, dadol helmere hebaani dum e njaabordi. Dadol reende dum e binndol ina jojji no feewi, kono yoo taw dadol ngol ngaastoto-daa ngol ada yenanaa ko dadol, wonaa kar-dadol. Kadi dadol helmere waylotoonde e mahdi, addataa jiibru to bannge payndiral mbinndiin kelme hono no dadol badal addirta dum e keerol hakkunde dadol e maande badal muumal, walla hakkunde maggol e lawirde. Ko duum wadi doftaade doosde mbinndiin ina roondii maanaa keeriido. Kono njanngiin e haala, ndoganta ko modondirde alkule dee, mbele haala kaa ina yaawa, wela, regoo.

Musidbe teddube, eden njoortii ngol doo taartaarol ngol mbañ-den e helmere deñnde, toddiinde sahaa : ñande, maa wood ko bœydi e faamaamuya mon e doosde mbinndiin mayre. Natten winndirde ñande, ñalnde, sabu wootere heen fof jogii ko maanaa mum keeriido. Hay so de badondirii wowlaango maanaaji majje ngonaa gootum.

Aamadu Tijjaani KAN

doosdiyanke, widtiyanke, kebloowo hebloofe.

Mali : Yahnoonde artii

Ko IBK wonnou hooreejo Mali gila hitaande 2013 nde o fiilaa gadanol. O todditaa kadi didmol he 2018. O fotnoo gaynude makko ko he hitaan-de 2023. O meediino wonde Hooreejo Suudu Jakkaa Ngenndi (he yonta Aamadu Tumaani Tuure -ATT-) ; o wonnou jaggal laamu laabi keewdi gila he yonta Alfaa Umar Konaare.

Gila sebbitiibe ngari he leydi Mali, ñalnde kala laamu ine roostoo he juude IBK. Ko dum addani koninkooße nanngude mo, be nawi mo to tuddunde maâbbae Sunjata Keyita to wuro Kati, wonnde to kilooji 15 hirnaange Kulubaa (Galle laamordo gondo dow haayre toownde do Bamako doo wiyatee Kulubaa).

IBK yaltii he ORTM, o wiyi : « ...mi fel-litii woppude golle am, golle am tuggude doo do kaalat-mi ». O yaltiri he tele hee ko omo suumii ngam reento-raade COVID-19, hedde feccere jamma, jamma talaata 18 ut (juko). Nde haalata ndee o wonnou ko nder tuddunde koninkooße, ina winndaatiitoonde makko « Hooreejo Ndenndaandi jaltudo ». Ko doon o habri wonde Suudu Jakkaa Ngenndijo kam e guwarnama oo fof pusaama.

Hol no kuudetaa oo yahri

He wiye koninkooße bee « So tawii ngonka wayii nih, alaa-e-sago konin-koobe naata heen », addani IBK wiye nde be njaggi mo ndee « mi jabirii Allah ko kewi koo ngati mi yidaa yîiyam Malinaabe rufa hay seeda. Ko duum tagi... mbede yidi yettude Besngu Mali nde dofti mi dîi duubî, gidli maâbbae he am, mbede wiya on mi dekkii joodorde laamu nguû, mi woppiai golle am fof tuggi doo do kaaldat-mi he mon doo ». IBK wiyi kadi « kala batte jaltugol makko



naatii heen » hay sinno ko o baawnaado yo o woppi laamu nguû. Suudu Jakkaa nattii woodde, Jaggorde ne ko noon. IBK woppi laamu ko jamma 18 feewde 19, caggal nde koninkooße njaggi mo, payri mo to wuro Kati, nder deeyorde koninkooße Sun Jaata Keyita.

Hoohoobe laamu heewbe njaggaama, mooftaama. Ina heen :

- Jaagorgal Garniwal, Buubu Siiseh,
 - Gardiido Kuubal koninkooße Mali;
 - Gardiido « gardeebe » kam e kalfi-naado ngalu mum ;
 - Abdullaay Daafe, Jaagorgal Faggudu e Ngalu;
 - Ceebele Daraame, Jaagorgal Gede boowalijje;
 - Muusaa Timbin, Hooreejo Jakkaa Ngenndijo; e Jaagoride wodbe heebé.
- Cosgol Goomu Ngenndijo ngam Sowre Besngu (Comité national pour le salut du peuple)
- Nde koninkooße teetti laamu he juude IBK, be cosi goomu ngennndijo ngam sowre Besngu. Be njangtii yidde maâbbae tafde dumunna dawrugol « siwil en » nder « mudda kakolindo ». Be kirjini kadi ma be dofto kala ko leydi Mali sii-

fondiranoo hakkunde leydeele. Dum fof ittataaleydeele keewde nder e booval Afiriki ina njogii kulhuli.

Eden ciftina, gila Mali hebi jeytaare koloñaal 22 settaamburu (siiito) 1960, deedoo teette laamu nay mbadirii ndoolndoolaagu, kañje fof de njoli ko maw-baare (talaata):

1. talaata 19 jolal (no-wambar) 1968, Moodibo Keyta yandinaa.
2. talaata 26 Mbooy (marsa) 1991, laamu ittaa he juude Muusaa Tarawe.
3. talaata 22 mbooy (marsa) 2012, ko ndeen Aamadu Tumaani Tuure ittaa.
4. talaata 18 juko (ut) yintaa ko IBK.

Holi bee koninkooße teettube laamu Mali ?

Kolonel Asimi Goytaa, ko kam toddaa yo ardo CNSP - « Comité National pour le Salut du Peuple » (Goomu Ngenndiiwu ngam Dadndugol Besngu). Ko kanko ardinoo Senngo Jeytiingo Doole Keeriide Mali, woni « Bataillon autono-me des forces spéciales du Mali (BAFS) » ngo tuddunde mum woni nehaande Mali, diwaan gondo he pelbondire hak-kunde koninkooße e sebbitiibe. Wiyaa ko o gorko cuusdo, deeydo hakkille.

Ñalnde 18 ut ndee, burnoo haaleede ardi filñitire koninkooße ndee ko Kolonel Maalik Jaw. Kono ñalnde 19, ko Kolonel Asimi Goytaa haali ko kam woni hooreejo CNSP, nde o hucciti he jaay-noofe. Nde o haalata ndee, koninkooße toowbe wodbe ina taarri mo. O wiyi : « Mali woni ko he ngnoka iiñcuru gila to renndo e dawrugol haa to ndeenka e

kisal... min potaani juggude ; nde min pelliti horbitde laamu, min ngardini tawo ko Mali ». Kolonel Goytaa tawto-raama golwole koninkooße Mali keewde... O tawtoraama kadi filñitire ndee, gila he fuddoode haa e wortorde jandingol IBK.

Kolonel Goytaa ina yahra he hedde duubi 40. O adii jaangude koninkaagal ko to "Prytanée" mo Kati (dudal koninkooße gila ko suakaabe), gonngal hedde 15 km Hirnaange Bamako. O jaangji to "Ecole Inter-armes" mo Kulikoro (5 km Fudnaange Bamako). Heewbe mbiyi ko kanko woni kurmbitfo moojobere ndee haa « kudetaa » o latii, wondude e yah-diibe makko be o jaangidi koninkaagal, hono Kolonel Maalik Jaw, e Kolonel-Majoor Ismayla Wage.

Kolonel Majoor Ismayla Wagee, ko kam jogii kumpital CNSP. O reentini Malinaabe he gede kaantare ko wayi no nguykaaji. O wiyi ñalnde Njeslaare ndee « yo Malinaabe ndutto he golle mum en...kuuge teddude maa pawe he kala jaggaado ina wujja teerji so tawii ko o dadiido ».

Kolonel Goytaa e wallidiibe mum ndaïii haaju. Hoto be damino balle ina ummoroo be caggal leydi. Ko buri heewde mbiyi ko yo be "ngoppu IBK arta he jodnde mum". CEDEAO, Ngootaagu Afriki, Ngenndiji Dentudi, Dowlaaji Diiso Ndeenka NU... fof mbiyi ko yo IBK e wondiibe mum ngoppe.

Holi Kolonel Maalik Jaw ?

Ko Kolonel Maalik Jaw ardi Tuddunde Kati, do fuddiibe moojobere koninkooße be ummii. Ina annadaa tan booyaani ko o arti ummoraade Ruusi to o beydoynoo janje. Wiyaa kadi subaka 18 o, ko kanko yettini IBK yidde koninkooße « o woppa laamu doon e tiisubaar (waktuuij 14 GMT) ».

Aamadu Malal Gey

OFFRE DEWLI

à partir du 3 avril 2019



L'offre n'inclut pas Thuraya, les îles et les satellites

Pour plus d'informations, contactez le service clientèle au 122

AVEC CHINGUITEL,

LE MONDE EST À VOTRE PORTÉE

Bénéficiez de minutes internationales pour communiquer en toute liberté

35 Minutes
Valable 30 jours

390 N-UM

*590*35# ☎

15 Minutes
Valable 15 jours

170 N-UM

*590*015# ☎

5 Minutes
Valable 5 jours

60 N-UM

*590*05# ☎

شقيق
Chinguitel
Membre du Groupe expresso